

安雅堂詩集

冊
一

張勳全集

一

安雅堂詩集

四陪齋要

四部備要

集部

上海中華書局據原刻本

校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

安雅堂詩序

荔裳先生之蒞吾越也未及數月而雷動風行百廢具舉予觀先生之治大都批卻導款而一本乎斯民之性情及問俗之暇出一篇以相示曰安雅堂詩予受而讀之而知先生之詩則又批卻導款而一本乎先生之性情者也詩之道難矣哉旬煅月煉句敲字推其不以三百篇爲岷山之一觴求其滴滴歸原者蓋亦鮮矣自夫漢魏齊梁初盛中晚之聲影盤牙於學者之簪次分別太明既舍下而趨上亦屈己以殉人譬諸東家之效西子縱盡得彼之影像而已失己之生動況其所爲效之者不取之於意態神格而區區從事於粉香脂澤云乎哉先生外不見人內不見己性情之發如是而出如是而止所謂滴滴歸原者耳憶先生與予同對

大廷時大鴻臚欲以體貌相加予浙及山左數人奮起交爭稍不爲屈成禮而退先生與焉時先生方終軍英妙之年相其意氣已具安天下之略顧予識先生之意氣於二十年之前今始識先生之性情於二十年之後予之知先生者

已晚乃其安天下之略試之吾越而吾越效予且身受其福予之知先生者又甚真也自先生治越登之至安而歸於大雅然則安雅二字先生以之顏堂者予一以論先生之治一以論先生之詩

順治庚子初冬日治年弟蕭山來集之拜手題

序

客有屬予序宋子詩者予曰予不可以序宋子也荔裳年弱冠詩賦動海內洎爲進士在郎署古文詞隨手傾出學者捧爲虬珠拱壁予時驚下騎款段馬隨衆出入館舍譁浪嬉戲受其書不能成讀己丑乞假歸先君從行篋中得之慨然歎曰今日詩宗乃在萊陽汝輩真愧死矣予時愧之然猶不肯讀書距今十年開裘繙詠紺珠寶母空青一色其言備四氣協三靈所爲和平之音猗那清廟之奏撞華魚錦安行庠序至其幽悲困蹙落寞之言則又如戛夜琴按霜刃情詞淒緊溢水滿山其心思可以釣淵弋雲握微連昊真詞路之八門五花也予年四十齒搖髮白今始卒讀年來朝夕靡辦無過條攀宋元枝綴中晚固不能步宋子之末塵欲一言時似不可得也夫人敘次文章如吏部放官必其品地高過作者不則肩背相望始可握管作讚誦之事予望宋子尙在天上何以序爲客曰此宋志也荔裳每語子詩雕琢極意饒有邾莒附庸之目今日詩宗果在萊陽而其詡子乃不去口何詎不可握管作誦乎予曰信如子言益不可

以爲序也夫三唐異製分河飲水予旣不能窺宋子之堂與顧自以詩導性情
隨人好尚故乃辭蛾眉効鑿齒卸進賢敦墊角以我視宋子常覺心愜目盱
貽擱然不敢自以爲詩又何以序爲客曰荔裳雖早貴中遭變故挈家浮頓吳
越之間幾致餬口及爲戶曹郎坐蜚語騎危躡險頌繫踰歲乃開花苑闢藻林
取千餘年之騷人墨士而衡續之其識日益廣學日益瞻其詩沉鬱淡雅日益
變化天其或者磨煉其志氣而發皇其神明譬之窮陰沍寒百物斲彫暘春一
至若華頓茁此宋子之所爲詩也物固不能兩全宋子擅文章之譽而其缺陷
乃在人事子從年少卽已優悠仕路所得于天者多矣何復覲其少者予曰春
華競芳然不能餘斷梗龍蛇起陸然不能植朽蛻夫予亦天地間之欠人也童
時喪母中歲喪父終膺惡疾貧窮愁苦千楚百沸卒未能奮然一肆力于筆墨
之場得與世之文士相頡頏天雖欲砥礪我亦終自棄也矣客曰宋子旣已許
子子之所爲讚誦宋子亦已至矣請錄以爲序予仍貽書宋子曰予不敢以序
子也

順治庚子仲冬同門弟金壇蔣超拜撰

安雅堂詩目錄

五言古二十四首

七言古十七首

五言律九十首

七言律九十首

五言排律十三首

七言排律一首

七言絕三十三首

六言絕二十一首

年家子丁克振

任韓燦

丁夢芝較正

安雅堂詩

萊陽宋琬玉叔著

五言古

上元公夫子

矯矯徂徠柏，芾芾龍門桐。靈鳳棲丹霞，綵翮飛嚶嚶。吾師海嶽姿，作賦凌崆峒。
彈琴面少室，雙鳥臨河嵩。到今溱蔡間，棠葉紛蒙茸。聖朝應期運，雷雨從飛龍。
詔拜青瑣闥，一鶚橫高空。袖中諫獵書，愷切回宸聰。東華退食暇，幃幕開扶
風。參差奮長濠，四座陳笙鏞。美材盡吳越，燕趙兼梁雍。賤子牀下拜，自哂同蕭
蓬。愧匪鄭高密，庶令吾道東。時維孟夏月，令旦薄天中。師年甫愈艾，膚澤如丹
紅。雲衣燦冰雪，手策青芙蓉。欲獻九如篇，蹇拙難爲工。嘗聞滄海上，貝闕羅珠
宮。羽人驂虬鸞，歌嘯烟波通。願師享黃髮，德與天魏崇。策名日月上，坐收鼎耳
功。方將騎白鹿，高揖尋韓終。或充掃花使，碧漢遙相從。

贈宮紫玄二章

翡翠巢蘭苕瓊枝棲海鶴君子秉遐思翱翔慎所託
寇撫長劍驅馬游京洛
衽褐揖公卿絳灌爲之忤太息昭王臺黃金久寂寞拂衣駕言邁去去青門郭
良朋別路衢客子行復却燕趙異疇昔濁酒猶堪酌古來羨豪達曾不羞翟籛
繫爾青驪駒懷哉咏場藿

其二

驚風飄朔葉玄雁鳴中林豈無稻梁志浩然江海心借問客何遊言返故山岑
平生懷五嶽杖策將幽尋褰裳欲從君畏此長淮深相知在顧盼豈必投兼金
何以敘綢繆三奏朱絃琴宵征易水上勿爲霜露侵惆悵薊門客俛仰嗟陸沉
贈別張蒼伯歸里

公孫昔未遇海上牧豪豬一旦躡麻屨射策承明廬吾友張伯子千里襦麴醪
觀書洞百家作賦鄙三都及余同蘧落偃蹇守菰蘆衆人尊其耳笑我爲轅駒
抗懷千載外高論追黃虞酒酣滅明燭殘雪埋戶樞盛年去如波沉乃憂患俱
上書來闕下名動卿大夫余方脫爵羅握手天一隅欲上昭王臺蔓艸久榛蕪

感茲拂衣去不乞步兵廚投老轉惜別欲去復蜘蹰賤子懷更苦不敢思尊鱸
故園北山北松檜交笙竽君歸幸相思好夢安可無

先大夫諱日萬壽寺禮佛因示諸生

墜葉豈更榮流波無重回哀哀古孝子痛哭嗟併囁余少薄祜賦無凌雲才
側聞過庭訓愛惜如瓊瑰弱齡把鉛槧慈顏爲之開乾坤當百六梁木忽然摧
譬彼玄鳥雛巢傾雕梁災譬彼松下艸霜落成枯荻自我歌鮮民星紀凡屢該
況乃忝符節隴山崔以魏松阡渺何處莫剪蒿與萊飄蕭生素髮膝下無嬰孩
緬想夜臺內惻惻傷其懷誓言守遺教敢令官方乖庶以清白風稍酬罔極哀
宛彼鳴鳩詩俛仰誠悲哉

其二

依依簷際燕嗷嗷林間烏經營哺其兒毛傷尾畢逋人生非空桑二人誰則無
匹庶有至性矧乃賢哲徒孝笋與甘泉感格良非誣義和無停策倏忽及桑榆
榮名一不早回首空嗟吁椎牛而祭墓不及酒一盃紫綵與丹書何如菽水俱

勗哉二三子努力崇令圖及爾北堂親策名日月衢曾閱在吾黨咫尺非遙途
作歌以相警慎勿學老夫

祭沈少參岫陽

昔我先大夫掄材古豫州八紘羅鸞鷟一顧空驂騑之子起河朔豪邁無與儔
射策居上第出宰臨東牟孤城兵火後父老嗟蜉蝣單車甫及境敷政何優柔
管絃遍衢巷多士歌薪燠翩翩遊冶兒買犢歸田疇甘雨赴期至黍稷皆盈篝
明堂計循吏續冠東諸侯到今朱邑祠歌哭未暫休維時我罔卿初服返海陬
家有小丘壑園林頗清幽公餘屏騶馭杖屨相追游臥觀溪月上醉聽松風遶
曰余方弱冠上書不見收感君恆倒屣匪從世法求憶君西歸日拔血別道周
詎知纏百六小邑遭戈矛殺戮盡兒耄白骨高于丘先人痛已矣微軀亦幸留
乾坤竟鼎沸四海合虔劉間關萬餘里鴻雁無飛郵聞君剖符竹千騎青海頭
何圖遘讒口貝錦誰爲謀鳳凰鍛羽翮燕雀徒啁啾祗役赴隴首邂逅問所由
痛哭呼穹蒼血淚零雙眸相視各老醜問我有子否昔別猶未鬚鬢髮忽如驚

握手更攜酒沉醉咸陽樓言將歸王屋終老營菟裘結廬百泉上簣簣千畝稠
藏書一萬卷足可恣冥搜況多秔稻田四時饒新菽汝如厭簪組偕我盟鷺鷥
君懷敬通憤兼抱西河憂還家席未煖沉疴遂無瘳凶計至成紀驚怛肝腸抽
隴水本鳴咽悲風益颼颼巨卿頻入夢素車慚滯遛故交日零落俛仰嗟浮漚
矧余際家難鵲鵠陷讎仇昔君鳴琴日顧我長悲愁充耳豈回聽覆轍將奚尤
緬想九原內聞之亦啾啾茲當發東圻掛劍臨松楸漉酒巾尙在清樽絕獻酬
吁嗟子敬琴絃亡真可掊令子雙琅玕樂棘過王哀墨莊餘素業所未憂終窶
哭罷顧王程欲去仍停輶回首蘇門道淚盡衡漳流

大雪自卦臺宿張秀才家

看山不厭遲暝色一何速雪花埋馬蹄迺就田家宿秦風無索綯白板新泥屋
主人貧且閒鮮種滿園竹答云遠塵市新曆未曾讀昨因賽先農豚肩會宗族
幸有濁醪存使君盡一斛夜聲靜鷄犬朝光見麋鹿告歸且復留公府下尺牘
何日謝簪纓還山買黃犢

丁酉季春赴任北平留別秦州守姜繼海

余以甲午春謬領隴頭節維時值天災厚地忽而裂可憐半秦民骨肉斃陶穴
板屋盡丘墟堅城無遺堞余也對殘黎呼天眼流血雖懷蒼生憂內顧慚薄劣
安得命世才同心拯危隍姜侯中州來熊車甫安轍下令減征徭秦人大歡悅
共發橐中金審端視圭臬奮錘手自操經營及瑣屑庶民盡子來鼙鼓弗可輟
麗譙乃翬飛高墉屹如鐵豺狼竟屏跡鴻雁有安宅憲府錄微勤馳書奏 朝
列小臣蒙大賚蟠螭出 御闈問誰爲佐理感君相提挈匡襄其不逮彌縫其
失缺茲當赴北平置酒未忍別古人有良規過剛則虞折君有百鍊金素絲果
清絕濟之以委蛇發言捫其舌剛柔寬猛間斟酌貴明晰況復嘉陵役閭閻膏
云竭努力策脩塗留心此倪耄大用佇可期比隆于稷契投淚強登車回首心
惓惓

寄蕭舍之

昔事大司農并轡游京洛長歡顧儔侶心期共然諾□□余多愁滑稽君善謔

歡讌夜忘歸醍醐傾鑒落一麾先後出音書兩寂寞烟波萬餘里肝膽向誰暴
感物迹已陳懷人事如昨夢寐見顏色然疑醒時作矧余年齒衰剖符隣絕漠
揚舟在中流汎汎安所託之子秉遐義道遠情不薄南方有奇樹相思結紅萼
封題寄塞垣清規代良藥

蜥蜴行

退食苦炎熱披襟聊散帙青蠅何營營室小厭充溢智勇兩無施未可張羅罫
承塵多蜥蜴三五相儔匹見蠅忽如怒奮迅搖其乙須臾翻靜嘿臨敵轉恐慄
將邇復斂身欲動或屈膝攻取勢多端精神迺專一青蠅一何愚忘情似親暱
呼吸飽唇吻百試不一失未卽盡驅除去我心所嫉吁嗟此小蟲暗合兵家術
始焉弩在機終也刃出韓叶古來師老馬戰勝未敢必衰至則寡謀禍機戒不
密可憐智伯頭竟爲仇人漆

夏雨初晴同路岷望太守王心任郡丞劉聲玉司李李公冶令君泛舟虎

頭石作